



partii naleraq

Nuuk 5. oktober 2018

Jens Napätôk, Partii Naleraq

Naalakkersuisut siulittaasuata ammaanermi oqalugiaataa tunngavigalugu oqallinneq.

Naalakkersuisut siulittaasuata Inatsisartut 2018-imi ukiakkut ataatsimiinnerat ammarlugu oqalugiaataanut, Ineqarnermut Attaveqatigiinnermullu Naalakkersuisumit atuarneqarluni saqqummiunneqartumut ima Partii Naleraq sinnerlugu oqaaseqaateqassaagut.

Asasakka ataqqinartut innuttaasut sineriatinni isortoqisumi najugaqartut Nunatta kangiani Ittoqqortoormiinngaaniit nunatta kitaani kujataaniit avannaarsua Qaanaaq tikillugu najugaqartut. Ataqqinartut Inatsisartut, ataqqinartoq Inatsisartut siulittaasuata. Ataqqinartut Naalakkersuisut sulisullu

Partii Naleraq sinnerlugu Naalakkersuisut siulittaasuata oqalugiaataa oqaaseqarfiginnginnerani pinngitsoorusunnigilagut oqaatigissallugu qilanaaratta suleqataanissatsinnut, qilanaarpugut Inatsisartoqatigut Naalakkersuisullu suleqatigilluarnissaanut immersuilluaqataanikut innuttaasut atugaat pillugit, taakkumi atugaat pillugit siuarsaarusulluta pitsanngorsarusullutalu qineqqusaarnikuugatta. Qineqqusaarnermi toqqammavigut sulinitsinni, tamaviaarnitsinnut tunngavisussapput.

Suleqataassaagut isummat allaanerusinnaasut inissaqartinneqartariaqarlunnarnerat tunaartaralugu, suleqataassaagut nunap inuisa atugaasa ilungersunarluinnalersimasut saqqummiunneqartarnerannut aaqqiissuteqarnissaq siunertaralugu, tassa isummat assigiinnginnerat saqqummiunneqartartut piviusunut aallaveqartuupput, atorfinittat qulaaniillu aqutsisut ulluinnarni takusanngisaat aammalu ungasippallaalersimasorinartut taakkununnga saqqummiuttassagatigit imaanngilaq taamaaliortaratta tusaqqusaarniaannarluta taamaaliortugut, imaanngilaq taartuinnarnik eqqartuiniartugut, kisiannili nunatta inuisa ullutsinni atugaraat ilaatigut ilungersunartorpassuit aaqqinniagassat. Taamaammata Partii Naleraq nunarput tamaat isigigalugu saqqummiisassaagut tamanna nangittumik ingerlatissavarput aammalu nassuerutigisariaqakkat ilagaat nunarput isorartungaarmat tamaat assigiinnik ingerlanniarneqarnera kukkunerulluinnartoq. Taamatut oqarnitsinnut tunngavigaarput Qitiusumi maani inatsisit naleqqussakkat amerlasuutigut kujataani naleqqussakkat, avanersuarmut Ittoqqortoormiunullu naleqqussinnaasannimmata. Nunarput tamaat ataatsimut inerisartariaqarpoq sumiiffiit inuit atugaat aallaavigalugit.

Partii Naleraq sinnerlugu isummat atukkallu assigiinngitsut saqqummiuttassuagut, tamanna qularutigineqassannigilaq, saqqummiisarnerput toqqammaveqassaaq pitsaanusumik naapertuunnerpaamillu nunap inuinit atugarissaanerulersititsinermik aqutissiueqataanissamik tunaartaqarluta angusaqarusulluta, tamannalu marrarmik milloornertut taakkartorniarnearluni ilaatigut nipeqartinniarnearqartaluartoq nunap inuisa atugaasa ilungersunarluinnartut matuuginnarneqarnissaanut soorlulusooq nipangersarniartaraluaatigut, tamaviaarnerput ingerlatseqqissuarput



partii naleraq

Partii Naleraq sinnerlugu taamatut oqareerluta Naalackersuisut siulittaasuata oqalugiaataani quleqqutsiunneqartoq isumaqatigilluinnaratigu oqaatigissavarput, tassalu qulequtiussamut ”issuaalaarpunga” ”Ingerlariaqqinnissamut piffissanngorpoq” ”Issuaaneq naavoq”

Ilumoorluinnarpoq assortuneqarsinnaanngitsumik Naalackersuisut siulittaasuata aatsaat taama ingerlariaqqinnissamut pingaaruteqartigaaq. Assersuusiulaassaanga: Ukiorpasuit nunarput qimaqqisimavara ilaatigut ilinniagaqqinnera tungavigalugu. Ukiut qulit pallillugit Upernavik illoqarfik aalisartoqarfissuurtut aalisartunik eqeersimaartorpassuarnik inuttaqartoq qimaqqa-reerlugu utersimavugut, tassani takusaq tupinnaqaaq, inuit ineriartoqqissimanerat qiviassanngikkaanni illoqarfik avatangiisaalu ukiut qulit nikissimanngitsut, sunnguamilluunniit sanaartorfigineqarsimanngitsut, pisortat illuutaat nutaannngilisut nutarsarneqarsimanngitsut, ilaalu inuerukkaangata nutarsaqqinnagit tuniniapallaannakkat. Eqqaavissuaq illoqarfik pujorsuarmik ulorianarluinnartumik poorlugu ikuallattaarneqaannarluni pisarnertut ingerlanneqarusartoq. Ilanngullugu oqaatigissavarput sinerissami pissutisit taamattut aamma allaaneruvallaanngitsut. Nunaqarfiit innuttai aalisarnikkut eqeersimaarlutik aningaasarsiorusullutik piumassuseqarluartut tunisiniartarnerat ilungersunarluinnartoq, tassami tunisigaangamik tuniseqqinnissamut ullorpassuit ilaatigut ullut 14-it utaqqeeqqaarlutik aatsaat tuniseqqissinnaasartut. Ukiukkut toqqorsiviit sikusimaliinnartoq ulikkaartartut inuttai aningaasarsiorusukkaluartut Nunatta aningaasarsiorneranut iluaqutaasussamik, tassami kisitsisit misissoraanni 2017-imi 4.400 tons-it pisarinngitsoorneqarput tunisiniartarneq ajornangaarmat. Inuusuttut inersimasullu sulerusukkaluartut, aalisarusukkaluartut licensitaartinneqarnaveersaartut ilaatigut erseqqinnerusumik nassiuuaanneqaratik, periarfissarsiorneqaratillu soq licens-imik pitaarsinnaanginneresut, taamaammat ilumoorluinnarpoq qulequtsiunneqartoq ingerlariaqqinnissamut piffissanngorpoq.

Ingerlariaqqinnissamut piffissanngorpoq Isorliunerusunut, illoqarfinnut nunaqarfinnullu peqataarusukkaluartunut tamanna qulequtaq atuunnersoq aperisariaqarpoq. Assersuutitik taasilaassaguma Kangersuatsiaq Ittoqqortoormiini inuttoqateqapajaarluni inissimasimasooq aammalu avannaani aalisarnikkut aallarnissanermi ajunngitsumik inissimasimasinnarluni maannakkut Selskabit piumasaqarsimanerat peqqutaalluni aatsaanngooq 2025-imi periarfissinneqarsinnaangoqqissapput aalisarnikkut siuarsaanikkut fabrikkiat qaleralinnik tunitsivigeqqusaajunnaarlugu piumasaqaatitalerlugu Royal Greenland namminersortumut tunisimammasuk, nunaqqatigiinnguit periarfissarsiorneqarnissaminnik milliaateqaralarput peqataarusunnerminnik, ilaatigut aqqqissutaagallartumik umiarsualiivigineqarnissaminnik noqqaagalarput eqqaat pisuussuteqaqimmat atorluarneqanngitsunik atorluartariaqariaqarluartunik nunaqarfiup nunattalu aningaasarsiorneranut iluaqutaasussamik, tamannaluunniit periarfissinneqarusussimannngilaq maannakkumut ukiorpasuanngortuni, taamaamat Partii Naleraq sinnerlugu aammaarluta kaammattuutigeqqissuarput tamakku aqqiviginissaanut alloriaqqinnissaanut aamma ingerlariaqqinnissamut piffissanngorpoq. Tamanna sumiiffinni amerlasuuni akuersarneqarsinnaanngitsumik atuuppoq.

Kangerlussuaq periarfissanik ulikkaarpoq, Sisimiut periarfissani ulikkaarpoq, taakkuinnaat qiviarutsigit nunaminertamigut nunatsinni periarfissaginnerpaat ilagigaat kialluunniit miserratisinnaanngilaa aammalu sila eqqarsaatigalugu unerisimanerpaamik silaannalik



Kangerlussuaq siunissami periarfissarpassuarnik assigiinngitsunik ulikkaarpoq siunissaq ungasinnerusooq eqqarsaatigalugu inerisaavigigaanni. Kangerlussuaq qanoruna inerisaqqinniartoq, amerikarmiunut sakkutooqarfinggoqqinniarpa, tamaasappat takornariaqarnikkut piniartarnikkullu killeqartorujussuannngussaaq, pissutsit 1992 siornatigut atuuttut uterfigineqaqqilerpat? Partii Naleraq sinnerlugu aallaqqaataaniilli oqaatigereerparput Kangerlussuaq ammaannassasoq aammalu periarfissarpassuit assigiinngitsut inerisaqqineqaqqassasut. Sakkutooqarfinggoqqissappat nunaqarfittut ingerlaannarsinnaava?

Taliffarteqarnikkut immikkut qeqertaliunngikkaluarni Sisimiut periarfissanik ulikkaarpoq, sooruna nuna taama periarfissaqartigisoq qarsupinneqarlunilu qaangiataarneqaannartoq? Neqissaqarniarnikkut siunissami periarfissanik ulikkaarpoq inerisaaffigeqqittariaqarpoq, maannakkut siunissamilu iluaqutaalersussamik. Ilumoortumik qulequtaq taakkununnga aamma atuutilertariaqarpoq ingerlariaqqinnissamut piffissanngorpoq.

Ilulissat aalisartoqarfissuuvoq taamaammat nunatsinnut ukiorparujussuarnik aningaasalersueqataasimavoq annertoorujussuarnik, taamaammat aamma Ilulissat taliffarteqarnikkut aaqqiifiginiartariaqarlunnarpoq kommune suleqatigilluinnarlugu, taamatullu aamma Upernavimmi aalisartunut naleqquttumik taliffarteqarnikkut qaqqitiveqarnikkullu aaqqiisoqarniartariaqarlunnarpoq ilumoorsinnaanngilarmi tamatigut angallateqartut iluarsartuussiniartut Aasiannukutartuartaqartut piffissamik aningaasatigullu annertuumik annaasaqaataasumik, ilumoorluinnarpoq ingerlariaqqinnissamut piffissanngorpoq aamma taakkununnga.

Aaqqissuusseqinnerit

Aaqqissuusseqinnerit ingerlanniarnearput tamanna Partii Naleraq sinnerlugu isummersueqataanikkut peqaataaffigissavarput. Nunatta inui tusaaneqartariaqarput qulaaniit aqutsineq kisimi aallaavigalugu aaqqissuusseqqittoqassanngitsoq neriuutigaarput, neriuppugut sumiiffiit najugaqarfiit assigiinngitsut aallaavigalugit aaqqissuusisoqassasoq sumiiffinnut ineriartoqqinnissamullu iluaqutaasunik.

Inunnik isumaginninnikkut aaqqissuusseqqinnerit pisariaqarlunnarput, tamannalu nunatta inui aallaavigalugit aaqqissuusisoqarnissaa allaavigalugu ingerlatsisoqarnissaa kissaatiginarluinnarpoq. Innarlutillit atugaat pillugit aaqqissuusseqqinnerit pisariaqarlunnarput, ilaatigut maannakkut naammattoortarpagut sineriammi inuit kissarsuuteqaratilluunniit inissisimasut, iniminniikkunnaarlutik angajoqqaaminnut nuussimasut, taamatut atugaqartitsinerit ullutsinni akisusaaffimmik tigusisimanitsinni akuersaarneqarsinaanngilluinnarpoq, taamatut atugaqartitsinerput.

Innarlutillit illersuisut tusagassiuutitsigut oqariartuuteqarpoq aningaatigut suliniarnerminni atugassarititaasut pitsaanngilluinnartut sullisatattilluunniit ornissinnaanagit akissaqartinnnginnimikkit.

Tassuuna takuinnarsinnaavarput nunatta qeqqa kisiat aallaavigalugul aaqqissuusiniarnerit ingerlanneqarsinnaanngitsut, nuna sinnera aamma allanik inoqarpat pisariaqartitsisunik.



Utoqqartatta atugaat nunatsinni ajorluinnarput, unat sanillersuuttakkagut misissuisimani qiviarutigut nunatsinni atugassarititaasut utoqqarnut appasinnerpaajupput. Tupinnanngitsumillu utoqqaat amerlasuut nunarput qimallugu utoqqaliartortariaqartarput atugassarititaasut pitsaanersut ornillugit. Aningaasatigunnangitsoq aammalu peqqinnissakkut sullineqarnermi.

Naalakkersuisut siulittaasuata oqalugiaammuni oqaatigaa Suliffissaaleqinerooq appariartorpoq, kisianni pissutsit piviusut imaapput, nunatsinnit inuusuttut ilanngullugit nunarput qimallugu aallararput, aatsaat ukiuni kingullerni taama amerlilluinnartigalutik.

Ataatat kisimiittut angajoqqaat kisimiittut ikorfartorneqarneri ikiorserneqarsinnaanerilu inuttut ingerlaqqinnissaanut periarfissai pitsanngorsaavigisariaqarput, ilumoorsinnaanngilarmi atukkat ilungersuarluinnartut assigiingitsut inoqatitta atugaat isiginngitsuusaaginnarlugit aaqqiivigineqarnaveersarneqassasut. Taakku Meerai aamma toqqissisimasumik peroriartornissaat qulakkeerniarneqartariaqarluinnarpoq. Taamaammat tamatumunnga tunngatillugu aammaarluta naalakkersuisunut ataatat angajoqqaat kisimiittut atugaat pillugit misissuigasuartoqassasoq kaammaattuutigeqqissuagut iliuuseqarnissamut toqqammaviussammata.

Meeqqanik arsaarinniinnartarnek annertuallaarujussuaqaaq, taamatut arsaarinninniinnartarnek innarliisarpoq annertuumik pineqartunut tamanut, pitsaanerumik periarfissaqartariaqarluinnarpoq, meeqqat angajoqqaallu pitsaanerumik aaqqiiffiginiarneqarnissaat nunap inuinit naleqqunnerumik aqqissuussiffiginissai piffissanngorpoq, angerlarsimaffiup avataanut inissiiginnartarnek periarfissatut kingullersaattut atortariaqarluinnarpoq, periarfissat allat atoqqaartariaqarluinnalerput.

Suliffeqarluni inuuneq akilersinnaanerulernissaa pingaaruteqarluinnarpoq, kisiannili aamma puigussanngilarput naleqqussagassaqarmat, sulisut suliffeerukkaangata periarfissatigut pisinnaatitaaffiilu innarleqqartarmata, soorlu Isorliunerusuni namminersortut ameerniartut amernik tigooraasut puisit amiisa ajornarseruttorfiani ileqqaakatik nungukkaangata arlaatigullu ikiorsertariaqalerneranni isertitaqarsimani peqqutaallutik ikiorserneqarsinnaanatik inissitarnerat ilungersunartuuvoq, peqatigiiffimmik kattuffimmilluunnii ilaasortaaffigisamik aarlaatigulunniit illersorneqaratik pisinnaatitaaffeqanngimmata. Taamatut aamma Piniarnermut allagartaqartut eqqugaasarnerat ilungersunartuuvoq. Inuimmi ikiortariaqalernerminni ajortoornerminni ikioqquniaannarlutik saaffiginnittanngillat, pisariaqartitsivissorlutik saaffiginnitarput, periarfissaq kingullertut tamanna iliuuseriniaraluarlugu, ikiorserneqarnissaminnut periarfissaqartanngillat.

Partii Naleqqammit ikiorsiisarnek pillugu aqqissuusseqqittoqartariaqartoq piumasaraarput.

Tunisasassiorfinni sulisut sulerusuttaraluarput ukioq kaajallallugu, tamakkulu ukioq kaajallallugu aaqqiifigineqarsinnagaluartut ukiuunerani tunisassiorfiit qerititsivii ulikkaarlutik matugaangata ikiorsinneqarsinnaaneri killeqartarneri aamma inunnut annertuumik sunniutipiluutigisartagai pitsaanersumik aqqissuussifigineqartariaqarput.

Akilerartarnikut aqqissuusseqqinnerit sulinermi akilersinnaanermut naleqqunnerumik aqqissuussiffigeqqinneqartariaqarluinnarnerat pisariaqarpoq.



Naligiinnerunissaq anguneqarsinnaanera pinerunngikkaluarlugu akunnattumik isertitaqartunik taasartakkagut, tassalu tapinik pisartagaqanngitsut maannakkut nunatsinni ingerlanitsinni iluaqutaanerpaagaluartut, kisiannili aamma tapinik pisartaqarsinnanera killeqarnerani akilersugassaminnut angummanniapiloortut naleqqussaaffiginissai aqqiffiginiarnissaalu piffissangorsorinarluinnarpoq.

Ilinniartitaaneq

Partii Naleraq sinnerlugu ilinniartitaaneq pingaartitaraarput taamatullu partiit minitaqarnata tamarmiusugut pingaartillugu oqariartuuteqaratta piorsarlugulugu inerisaqqitariaqartoq isumaqarpugut, taamatut iliorneq ungasinnerusoq isigalugu innuttaasut periarfissaanik allatigullu pitsaannerusumik atugaqalernissamut aqqutissat sakkut ilagilluinnarpaat. Taamatullu oqareerluta ilinniarnermi unitsitsiinnartanninnissamut pitsannorsaatit ilanngullugit pitsannorsartuarnissaat kaammattuutigerusuppugut, unititsiinnartartummi sulii amerlavallaarujussuarput. Taamatullu praktikerfissaqannginnerit peqquataallutik ilinniarusukkaluartut sulii amerlavallaarput taamaatut ilinniakkaminnik aallartinngitsoortartut.

Qaffasinnerusumik ilinniagaqartut inuttut ineriartoqqittuarnissaat aamma pikkoriffiginerusariaqarparput tamannalu nunat allat suleqatigalugit piukkunnarsartarnerit periarfissarsiornerusariaqarparput. Nunatsinni ilinniarluarsimasut qaffasissumik atorfittaartartut annikipallaarujussuurtut qaffasinnerusumik atorfinittarsinnaanissaat aqqutissiuunerusinnaasariaqarparput. Nunatta pisariaqartippai qaffasissumik ilinniarsimasut atornerqarnerunissai aammalu aqqutissiuunneqarnerunissai.

Nunaqarfinni isorliunerusunilu ukuiunerani ilinniartitaanikkut pikkorissarnikkullu periarfissat amerlisarnerusariaqarput, periarfissarpassuusinnaapput soorlu motorilerinnermut, radiocertifikatinut, regnskabilerinnermut allarpassuillu ulluinnarni inuunermut aningaasarsiornermut iluaqutaasut ingerlanneqarsinnaapput. Taamatullu ilanngunneqarsinnaalluarput inuussutissarsiornermut ingerlatsinnermut nutaanillu pilersitsinissamut periarfissanik annertusaanissamut pikkorissarnerit.

Inuussutissarsiuutinik nunatsinni pilersititsinissaq pilerinarninngorsartariaqarpoq aammalu pioreersut nunatsinniiginnarnissaanik avataaniillu nunarput aningaasaliiffigalugu inuussutissarsiorfiginissaa soqutiginarsartuariaqarpoq, tamanna ilaatigut selskabsskati qaffasippallaarujussuortoq 15%-imut apparnissa periarfissatsialaat ilaattut kaammattuutigerusuppugut.

Aalisarneq

Aalisarneq nunatsinni aningaasarsiornikkut isaatitsisutitta pingaarnersariinnangilaat ilaqutariippassuarnut nunap inuunut iluaqutaaffippassuaqarpoq, taamaammatt aalisarnermut inatsisissaq sukumiisumik susassaartut tamarmik peqataatillugit suliarisariaqarpoq. Aalisariutaatillit soorunami sunniuteqarfigisussaammassuk aqqiissusseqqinnermi paaseqatigiiffiusumik tamanna aqqiifiginiartariaqarluinnarpoq aammalu paasineqartariaqarpoq nunap inuisalu aningaasarsiorfigisinnaasaanik qulakkeerinnittumik aqqiissuteqartariaqaratta.



Akitsuusersuinikkut akileraarusersuinikkullu aallerfigiuarsinnaangilagut, selskab skat appartinneratigit kajungernartunngortittariaqarparput nunatsinni datterselskabeqarnissaanut allatigullu nunatsinni tamakku periarfissagissaarnerunissaat avammut annissuinnarnagit arlaatigit aaqqissariaqarpugut, naleqarnerutitsilernikkut. Tunisassiorfiit kajungernarsartariaqarput suliffigissallugit aningaasarsiatigit atugassarititatigullu. aalisartoqarneq nunatta inuisalu annertunerusumik iluaqutigisariaqalerpaa, pisuussutigut inuit ataasiakkaat selskabillu aningaasarsiornerannut innarliinngitsumik aaqqiinikkut.

Nunatta inui assigiinnerusumik pineqartariaqarput, assigiinngisitsineq naammaleqaaq, ilumoorsinnaangilarmi selskabet nunap inui assigiinngitsumik pissagai kisermaassinertik peqcutigalugu aalisakkat assigiit assigiinngitsumik akilersormatigit. Kisermaassinermi ingerlatsineq aamma pisussaaffiliivoq innuttaasut naligiinnerusumik pinissaat inuiaqatigiit pisuussataat atorluarnissaanut. Ilumoorsinnaangilarmi unammilleqatigiinneq neqitaralugu avannaani ingammik Upernaviup eqqaanilu aammalu Avanersuarmi akit appasinnerungaassasut iluanaarutiginerullugit, qaleralik kilomut 16,50 ilersorlugu kujasinnerusumi 30 kr. sinnerlugu akilersortaraat, tamanna periuseq ilumoorsinnaangilaq selskabip ataatsip iluani, unammilleqatigiinneq neqitsiullugu, tamanna nunatta inuinit immikkoortitsinertut oqaatigineqarsinnaavoq, sakkortuumillu kaammattuutiginarpoq taamatut nunatta inuinit immikkoortitsisoqarunnaassasoq unammilleqatigiinneq neqitsiullugu ingerlatsinermi.

Nunatsinni aalisariutini umiarsuarnilu inuiaqatigiit pigisatsinni kalaallit aqumiutut atornerulertariaqarparput, ilumoorsinnaangilarmi nunap allamiunut tamakku ingerlanneqartuassasut nunatsinni taamatut ilinniarsimasunik peqareerluta. Ilinniartitaanerup qaffassaaffgineranut ilutigitillugu nunatsinneersut pikkorissarlutik ineriartortuarnissaat periarfissarsiorariaqarput. Nunat saniligut qissimigaarlugit pikkoriffigisai nunatsinnut aamma naleqqussarlugit atorluarnerusariaqarpagut.

Partii Naleraq sinnerlugu nuannaarutigaarput Naalakkersuisut aalisarnermik inatsisissamut suliaqarnermi susassaqtut assigiinngitsut tamarmik akuutinneqarnissaanik pingaartitsillutik oqariartuuteqarmata, tamannalu Partii Naleqqamit tamakkiisumik tapersersorlugulu peqataaffigissavarput.

Aatsitassarsiorneq

Partii Naleqqamiit isumarput aaliangiusimavarput aatsitassarsiornermut tunngatillugu, tassalu aatsitassarsiorneq ingerlanneqarnissaanut qulakkeerneqaaqqaartassasoq mingutsitsinertaqannngitsumik piaanissaq qulakkeersimaneqartinnagu piaanissamut akuersissutissanik tunniussisoqartassanngitsoq. Pinngortitarmi mingutsinneqassanngilaq aningaasarsiorinissaq piinnarlugu. Taamaattumik taamatut inuussutissarsiuulernissarput eqqarsaatigilluagaasumik ingerlanneqarnissaa Partii Naleqqamiit pingaartipparput. Sumiluuniit kuummi imersinnaajuartariaqarpugut.



Takornariaqarneq

Takornariaqarneq pingaaruteqartutut oqalugiaammi eqqaaneqarpoq aammalu inuussutissarsiutaanerata annertusarnissaa Naalakkersuisut siunertarigaat oqaatigineqarluni, Partii Naleraq sinnerlugu isumaqarpugut tamatuma piorsarneranut ilutigalugu nunaqavissunut ingerlanneqarnissaa sulissuteqarfiginerusariaqaraat, avataaninggaaniiginnarmi sumiiffinni amerlavallaani aningaasarsiutaanerunera annertuallaaqaaq, nunap inui isiginnaartuuginnarnerat annikillisarneqassappat piorsaaffiginerusariaqarlunnarluni.

Ineqarneq

Namminersorlutik Oqartussat inissiaataat naalagaaffimmiit nutaanngilisut nutarterneqanngitsut tiguneqarnikuuneri nunatsinni ukiorpassuarni ajornartorsiortitsivoq aammalu illut nutaanngilivallaartut ullutsinnut naleqqukkunnaarsimasut attartortinneranilu akigitinneqartut qaffasippallaalersimasut kukkussuteqarfigeqqittariaqanngillat. Inissiat aaqqinnaviannngillat kommunimut tunniutiinnarneratigut amerlavallaarujussuarput peqqissutsimut ulorianaateqartut ullutsinnullu naleqqukkunnaarsimasut, sumiiffinni amerlavallaani matooraannakkat amerlavallaaleqaat, tamakku kommunemut tunniutiinnarlugit aaqqinneqarsinnaanngillat, taamaammat Naalakkersuisunut sakkortuumik kaammattuutiginarpoq tamakku tunniutiinnarnagit pilersaarusiortigineqarluassasut nutaanik taarsersornissaanik ullutsinnut naleqqunnerusunik aammalu inuusuttunut utoqqarnullu inissiat nalequttut amigaataaqisut akilersinnaasaallu ilanngullugit.

Namineq illuliortarneq isorliunerusuni innarlerujussuarneqarsimavoq aaqqissuusseqqinnermi taamaammat nuannaarutigaarput Sanaqateqarluni illuliortarneq Naalakkersuisut nutaamik piumasqaatinillu naleqqunnerusunik sakkukinnerulersitsisussanik imaqartumik saqqummiiniarmata, tamanna isorliunerusuni atorluarneqaaqqinerulerneranik kinguneqassasoq neriuutigillunnarparput.

Ilanngullugu kaammattuutiginarpoq Timersorneq illoqarfimmiinnaq inerisarneqarsinnaanngimmat aamma isorliunerusuni nunaqarfinnilu timersortarfeeqqanik sanaartornerup ingerlatseqqilernissaanik kommuni suleqatigalugu aaqqiiniartoqassasoq.

Illu sulliviit nunaqarfiit ilaanni suli amigaataapput, taammaattumik tamakku ilanngullugit kommunit suleqatigalugit pilersaarusiortunilu sanaartortoqarnissaanut aqqitssiueqataaqqullugit Naalakkersuisut kaammattorusuppagut.

Inissaaleqinerup saniatigut angerlarsimaffeqanngitsut nangittumik angusaqarfiusumik suliniuteqafigineqartuarnissaat sakkortuumik Naalakkersuisunut kaammattuutigerusupparput

Inissiat allaffissornikkut kiffartuussiffigineqarneri ingerlativiunerilu nalilersortuartariarparput ilumoorinnaanngilarmi inuiaqatigiit taama ikitsigisugut kiffartuussiffigineqarneranni pisortat qullersat taama amerlatigisariaqarneri, taamaammat eqaannerusunik pisariinnerusunik akikinnerusunumillu ingerlatsisoqarsinnaanera ujartoqqunarpoq, maannakkummi periusersagut ineqartut akilertagaat akisuvallaarujussuaqaat.



Pinnngortitat avatangiiserlu

Eqqagassalerineq aamma selskabersualiuuteqqilerpoq? Pisortai siulersuisuilu akissarsiakkaat atuisut akilersugassaat, nunatsinni inuuniarnej akisoreeqisoq aamma sulii akisuninngorlugu aaqqinniarneqalerpa?

Mittarfiit ilai selskabinnngortinneqalerput nunap inui sineriammi angalasinnaanerit periarfisseqqaannguarnagu ajorseriaataanngitsumik aaqqiinissaq qulakkeeqqaannguarnagu.

Peqqinnissaqarfik pitsanngorsaavigineqarnissaanut akissaarulluta imminut inorsilluta inissilinnginnerpugut? Uagut nunatta akilersinnaasaanik 1199-meterinut oqalukkaluarnerput tusaaneqanngimmat uggoraarput aammalu sinerissami angallaneq ajoreeqisoq ajorseriarsinnaaneranut aarleqqutissaqarluta peqqutissaqarpugut.

Qallunaat akulerupput aaliangerniarnitsinnut ilaatigut oqaatigalugu illoqarfiinngooq marluk investeriiffiginiamikku akilersinnaasortai.

Kangerlussuaq periarfissarpassualik Amerikarmiunngooq isumalluutigalugit ammaannarnissaa qulakkeerniarneqarpoq, qulakkeerneqaaqaarani mittarfissuit pingasut nunatsinni inukeqisumi ingerlanneqarsinnaasasut akilersinnaasumik. Nuup Ilulissallu akilersinnaanngitsumik ingerlalissagaluarpata qallunaat 33,3%-imik piginneqataanerat oqaasertalerneqareersimavoq piginneqataanerat qaffangaarsinnaasoq. Pissaaneq annertoq qallunaanut tunniuteqqilerparput.

Mittarfissuit perusuinnarlugit nunatsinni inerisagassarpassuit ukiorpassuarni kinguartinneqarput tamannalu illoqarfissuarnut akiugassaannngitsumik nussornermik kinguneqartussannngussagunavippoq.